

MERIMA HADŽIĆ DEDOVIĆ

Program Architect and
Software Developer at
Authority Partners



NAŠE WEPs PUTOVANJE PRINCIP 4: OBRAZOVANJE I OBUKA ZA NAPREDOVANJE U KARIJERI

S obzirom da, kao svršenic osnovne škole, jos uvijek nisam imala ideju šta želim biti „kad porastem“, izabrala sam da svoje srednjoškolsko obrazovanje nastavim u gimnaziji. U završnoj godini nam je informatiku predavala profesorica Ehlimana koja je znala na pravi način nam približiti osnove programiranja i učiniti da taj posao izgleda jednostavno i zanimljivo. Probudila je u meni inženjerski način razmišljanja i tada sam zaključila da je to nešto što mi leži i čime bih se mogla baviti u budućnosti, tako da sam izabrala Elektrotehnički fakultet za nastavak školovanja te AP Lab nakon završenog bachelora gdje sam se uvjerila da sam napravila dobru odluku i da je posao u IT ono što želim raditi.

AP Lab polaznicima daje ideju o tome kako je raditi u timu, kako teče proces rada na projektu i šta je sve potrebno da bi projekat uspio čime se upoznaju sa kulturom kompanije i pripremaju za rad u AP. Proces učenja i mentorisanja ne završava tu, nego svi uposlenici imaju sistem podrške u obliku mentora, vođe tima i svojih kolega u timu. Ovo je pogotovo jako bitno novim mladim kolegama, bez prethodnog radnog iskustva koji se na ovaj način bolje integrišu u timove i uz podršku brže počnu davati značajan doprinos timu i projektu. AP kao kompanija koja i dalje raste nudi stabilno radno mjesto ali i, naprimjer, fleksibilno radno vrijeme i porodiljno odsustvo tako da žene ne moraju birati između profesionalne karijere i imanja djece i mogu uživati u novom poglavlju svog života bez straha od gubljenja svog zaposlenja.

Istakla bih dvije prednosti rada u IT industriji. Prva je nešto što sam primjetila jako rano, na samom početku svoje karijere u AP gdje sam dosta surađivala direktno sa klijentom a to je da nije bitno da li sam žena ili muškarac sve dok sam sposobna odraditi svoj posao na nivou koji je očekivan. Druga prednost je to što rad u IT ne podrazumijeva samo jedan smjer u kojem se neko može usavršavati i dati doprinos – IT industrija pokriva mnogo različitih poslova koji nisu samo programiranje tako da različiti profili žena mogu pronaći svoje mjesto u IT kompanijama i dati svoj doprinos poboljšanju IT kompanija.

Kada pogledam nazad na svoje obrazovanje i same početke u karijeri ali i posljednjih par godina, veliku ulogu u mom napretku su igrale žene. Od moje profesorice informatike koja mi je usadila ljubav prema programiranju preko moje mame koja me gurala kroz fakultetske dane pa do mojih kolegica s posla koje su postajale jako bliske prijateljice. Poznata je izreka da je žena ženi vuk ali mnogo je ljepše kada je žena ženi drug tako da moja poruka je okružite se ženama s kojima ćete se međusobno podržavati, davati vjetar u leđa i biti pomoć kroz izazove kojih će biti uvijek, od škole preko fakulteta do posla.

Okružite se ženama s kojima ćete se međusobno podržavati, davati vjetar u leđa i biti pomoć kroz izazove kojih će biti uvijek, od škole preko fakulteta do posla.